



Bosnia and Herzegovina  
Federation of Bosnia and Herzegovina  
**CANTON SARAJEVO**  
Ministry of Justice and Administration

Broj: 03-04-02-22884-2/23  
Sarajevo, 29.09.2023. godine

## SKUPŠTINA KANTONA SARAJEVO

gosp. Elvedin Okerić, predsjedavajući Skupštine Kantona Sarajevo

**PREDMET: Odgovor na zastupničku inicijativu zastupnice Mersihe Mehmedagić, dostavlja se –**

**VEZA: Akt Skupštine Kantona Sarajevo, broj: 01-04-24618-43/23 od 30.05.2023. godine**

Zastupnica Mersiha Mehmedagić je u skladu sa članom 213. stav (1) Poslovnika Skupštine Kantona Sarajevo ("Službene novine Kantona Sarajevo", br. 41/12-Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22 i 17/22 - Ispravka), na Osmoj radnoj sjednici Skupštine Kantona Sarajevo, održanoj dana 30.05.2023. godine, u okviru tačke Dnevnog reda "Poslanička/zastupnička pitanja, inicijative i odgovori", uputila zahtjev za dopunu odgovora na zastupničku inicijativu u kojoj se traži da Ministarstvo pravde i uprave pojasni "*koji pravni okvir je potrebno uskladiti, radi li se o pravnom okviru iz nadležnosti Kantona Sarajevo ili je potrebno inicirati izmjene pravnog okvira viših nivoa vlasti, koje tehničke uslove je potrebno osigurati uz procjenu potrebnih sredstava kako bi se omogućilo provođenje konsultacija i javnih rasprava elektronskim putem.*"

Pored navedenog, u zastupničkoj inicijativi se traži pojašnjenje "*da li se inicijativa može tretirati kroz Zakon o elektronskom upravljanju u Kantonu Sarajevo koji se po Programu rada Skupštine KS planira usvajati u periodu novembar-decembar?*".

S tim u vezi, Ministarstvo pravde i uprave dostavlja sljedeći odgovor:

Postupak provođenja javne rasprave propisan je čl. 141. - 144. Poslovnika Skupštine Kantona Sarajevo ("Službene novine Kantona Sarajevo", br. 41/12-Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22 i 17/22 - Ispravka) (u daljem tekstu: Poslovnik). Članom 142. stav (2) Poslovnika, između ostalog, propisano je da *rok za provođenje javne rasprave teče od dana dostave nacрта zakona obaveznim sudionicima javne rasprave*. Uspostavljanjem portala za provođenje konsultacija i javnih rasprava elektronskim putem ukazala bi se potreba za izmjenama, odnosno dopunama navedenog dijela Poslovnika, uzimajući u obzir specifičnosti koje se odnose na postupak provođenja konsultacija i javnih rasprava elektronskim putem.

Kada je u pitanju Kanton Sarajevo, Uredbom o vrsti i postupku objavljivanja propisa i javnosti rada organa uprave, javnih preduzeća, javnih ustanova i pravnih lica čiji je osnivač Kanton Sarajevo ("Službene novine Kantona Sarajevo", broj 21/19) propisano je da su organi javnog sektora dužni, prilikom izrade propisa i drugih akata koji imaju karakter općih akata, primjenjivati Pravila i postupke za izradu zakona i drugih propisa Federacije Bosne i Hercegovine ("Službene novine Federacije BiH", broj 71/14), i omogućiti zainteresiranoj javnosti učešće u postupku pripreme propisa i drugih akata koji imaju karakter općih akata.

Izmjenama, odnosno dopunama naprijed navedenih kantonalnih propisa, prema stavu ovog ministarstva, mogao bi se osigurati i pravni okvir za uspostavljanje i korištenje web portala za provođenje konsultacija i javnih rasprava elektronskim putem.

Također, donošenjem Zakona o elektronskom upravljanju u Kantonu Sarajevo, kojim bi se definisao način identifikacije, odnosno autentifikacije korisnika usluga koje se pružaju elektronskim putem, osigurao bi se jedan od bitnih preduslova za realizaciju predmetne inicijative.

U vezi sa tehničkim uslovima koje je potrebno osigurati i procjenom potrebnih sredstava, Ministarstvo pravde i uprave se obratilo Zavodu za informatiku i statistiku Kantona Sarajevo dopisom broj: 03-04-02-22884-1/23 od 14.06.2023. godine.

U odgovoru Zavoda za informatiku i statistiku Kantona Sarajevo, akt broj: 26-02-2284-2/23 od 11.08.2023. godine, između ostalog, navedeno je da se *navedena aplikacija ili web portal može hostirati na serverima Zavoda, a da se aplikacija treba posebno izraditi*. Dalje je u navedenom aktu predloženo *da se formira radna grupa za izradu Projektnog zadatka - aplikacija za javne rasprave Kantona Sarajevo, na osnovu čega bi Zavod mogao procijeniti da li može samostalno razviti navedenu aplikaciju ili je potrebno da to radi posebno pravno lice (vanjska firma)*.

Također je istaknuto da se procjena sredstava za razvoj navedene aplikacije može utvrditi na osnovu Projektnog zadatka i istraživanjem tržišta, a što ovisi od složenosti i sredstvima potrebnim za održavanje aplikacije. Vrijeme izrade aplikacije okvirno je 6 mjeseci, ne uzimajući u obzir vrijeme potrebno za provođenje postupka javne nabavke.

Pod uslovom da budu ispunjeni naprijed navedeni uslovi u vezi sa usklađivanjem pravnog okvira i obezbjeđivanja tehničkih uslova i sredstava, Ministarstvo pravde i uprave će pokrenuti aktivnosti u cilju uspostave web portala za provođenje konsultacija elektronskim putem.

S poštovanjem,

Dostaviti:

1. Naslovu;
2. Stručna služba Vlade Kantona Sarajevo - na znanje;
3. a/a.

